

Pasashi di mas barata di Hulanda pa Aruba

Ora lesa di "**Vrije Vogel**" na Corsow, cu ta un grupo di hulandesnan mes, cu ta critica e manera cu KLM ta usando e islanan aki, mi ta goza hopi, pasobra e organizacion aki ta papiando hopi verdad y ta e uniconan na Antiyas (y Aruba) cu ta pone pia abao contra e parha di plata cu corona, cu su monopolio riba e ruta di Hulanda, Europa pa Aruba.

Siman pasa e "**Kinikini**" den carnaval a bisa e "**shoko**" algo, y mi a dicidi di laga averigua na Hulanda. Mi a tuma contacto cu varios hende den varios ciudad pa nan "**bay reserva pasashi pa Aruba pa luna di december**".

Mi a ricibi mi contestanan fin di siman.

No tin pasashi pa Aruba mas manera nos ta tende, lesa y scucha di promocionnan.

E pasashi barata no ta existi mas.

E pasashi di mas barata cu nan por haya for di awor (Februari) pa december, ta 3000 florin.

Si, tres mil bubu.

Ningun estudiante cu kier bin Aruba pa pasa cambio di milenio na Aruba no por bini Aruba cu KLM.

Ningun Arubiano cu kier bin bishita familia pa fin di aña no por bin Aruba tampoco, si nan no tin "**drie duizend pop**" pa paga.

Y nos ta tende tur dia di e asina yama "**Open Sky Policy**" cu ta bloquee pa "**Aruserca**" y cu ningun Arubiano no por probecha di dje.

Di Hulanda si por bay Cuba pa 900 florin cu tur cos inclui, por bay Santo Domingo, por bay Isla di Margarita cu tur cos inclui, hotel, cuminda, tour etc.

Tur esey pa alrededor di mil florin, pero pa bin Aruba, bo tin cu paga 3 mil "**gulden**".

AMBTENAAR CU NO TA AMBTENAAR MAS

Aki na Aruba tin tambe un situacion cu tin mas o menos 2 aña pasa cu

mi a cuminza mostra riba e "**wega**" y cu poco poco e reglamentonan tur bruha a cuminza sali na cla.

Esey tabata e AZV.

Esaki a bira asina un elefante cu nos specialistanan ainda ta bibando den incertidumbre.

Algun luna pasa mi a menciona di e contrato sin pia sin cabez cu kier a forza riba riba specialistanan na hospital.

Diripiente despues, a para fecha di firmamento y a pone fecha nobo.

Kende por imagina cu for di juli aña pasa pa awe specialistanan a ricibi 6 carta caba cu aki dos luna nan ta wordo retira.

Tin especialista cu 20 aña a traha pa gobierno como ambtenaar, y diripiente no ta ambtenaar mas y cu no a acepta esaki tampoco, pasobra e "**retiro via carta aki ta retiro inhustifica**".

Nan no a nenga di traha.

Ta e manera cu nan ta wordo forza pa retira nan no ta acepta.

Si nan rabia, stop di traha y pa dia 4 pa 5 hende muri den hospital pa falta di especialista, e ora ey si lo tilda nan di tur falta.

Tin un falta di seriedad grandi tumando lugar.

E mandamento di carta cu aki dos luna bo ta retira ta un imposicion contra libertad.

Mandamento di carta via abogado cu especialista tin 30 dia pa reacciona, nan no ta acepta tampoco.

No por retira nan como ambtenaar pa duna nan un contrato asina asina.

E cos aki lo bay para internacionalmente na organizacion di derechonan humano sigur, pasobra e cartanan aki ta un atake contra tranquilidad di e specialistanan pa lunanan largo caba.

Straño ta cu ni e gremio di mediconan no a reacciona contra e cos aki cu ta atenta ademas contra ley laboral.

Juby